

Siunnersuut: Inatsisartut Ombudsmandiata 2009-mut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiiffigisassaattut siunnersuut.

Akissuteqaat

(Naalakkersuisut Siulittaasuat)

1. Siullermeerneqarnera

Aallaqqaasiutigalugu Inatsisartut Ombudsmandiat 2009-mut ukiumoortumik nalunaarutaanut suliarilluakkamut qujaffigerusuppara.

Namminersorlutik Oqartussani, kommunini pisortallu ingerlatsivianni oqartussaasut allat suliaanik nakkutiginninneq Ombudsmandip suliassaraa. Taakkua saniatigut suliffeqarfiit sullissiviillu tamaasa Ombudsmandip ataaniittut Ombudsmandip ornillugit misissoriartorsinnaavai. Naalagaaffiit Peqatigiit naalliutsitsinermut isumaqatigiissutaanut ilanngussamut pinaveersaartitsinissaq eqqarsaatigalugu Ombudsmandi suliassaqarfeqalersimavoq.

Ombudsmandi Naalakkersuisunut, atorfilinnut Inatsisartunullu attuumassuteqanngilaq. Taamaattumik Ombudsmandi arlaannaannulluunniit pituttorsimanani misissuisinnaatitaavoq. Ombudsmandi innuttaasut illersuisuattut taaneqartarpoq, innuttaasullu inatsisitigut illersugaanissaat tassaavoq, Ombudsmandip qulakkiigassaa.

Taamaattumik Ombudsmandi inuiaqatigiinni tamat oqartussaaqataaffianni pingaarutilimmik inissisimavoq.

Ombudsmandip pisortat ingerlatsinerminni inatsisitigut maleruagassanik taakkualu pitsaassusaannik malinninniarnarat isumakulunnartoqartoq, Inatsisartut aalajangiiffigisassaattut siunnersuutaata ersersippaa. Inatsisit Atortinneqarnerannut Ataatsimiititaliaq ima oqaaseqaateqarpoq: "Aamma minnerunngitsumik sulianik suliarinnittarneq pillugu inatsimmi aamma pisortat ingerlatsineranni najoqqutassani nalinginnaasuni pisortatut oqartussat pisussaaffii inatsisitigullu tunngavigeqqusat allaffissornermi oqartussat maluginiassagaat ukioq manna nalunaarummi pingaartinneqarpoq. Tassani pisortat oqartussat paasissutissiisussaataitaanerat ilitsersuisussaataitaanerallu assersuutitit erseqqissarneqassaaq, taassumammi malinneqarnissaa innuttaasunut aamma pisortatut oqartussat tatigineqarnissaat eqqarsaatigalugu pingaaruteqaqimmat. Kisianni ukiumoortumik nalunaarusiap ersersippaa, uagut inatsisiliortutut erseqqarluttunik melittarisassaliunnginnissarput anguniartussagipput".

Maannakkut Naalakkersuisut siusinnerusukkullu Naalakkersuisuusimasut ukiorpassuarni inatsisit pitsaanerulernissaat suliassatut salliutittuartarsimavaat. Taamatut salliutsisineq suli ingerlavoq siunissamilu Ombudsmandimit, Inatsisartunit taakkualu ataatsimiititaliaannit Naalakkersuisuniillu malinnaaffigineqarnissaat suli pisariaqassaaq. Ukioq manna Namminersorlutik Oqartussani inatsisilerituunik arlalinnik atorfinitsitsisimagatta nuannaarutigaarput, tamatumalu ukiumi aggersuni tullerni inatsisit tungaatigut pitsaassutsip qaffassarnissaanik neriuteqalersippaatigut.

Suliani ikittuinnarni aqutsisut inatsisinik ingerlatsinermi maleruagassanik malinnissimanninnerat Ombudsmandip maluginiarsimagaa, Naalakkersuisut nuannaarutigaa. Kisianni suliaq ataaseq suliamik ataatsimik amerlavallaarpoq, Naalakkersuisullu allaffissornikkut oqartussaasut inatsisinik ingerlatsinermi maleruagassanik malinninnissaat nangittumik sulissutigissavaat.

Ombudsmandip nalunaarutaata siunissami atuaganngorluni saqqummernani CD-ROM-itut saqqummertalernissaanik Ombudsmandip siunnersuutaa Naalakkersuisut isumaqatigaat. Tamanna aningaasaqarnikkut sipaarutaaginnarnani avatangiisinut aamma iluaqutaassaq.

Taamatut oqaaseqaateqarlutik Inatsisartut Ombudsmandiata 2009-mut ukiumoortumik nalunaarutaa Naalakkersuisut tusaatissatut tiguaat.